

→ INSPIRASI

'Jadi wira demi anak'

→ Bekas pemain ragbi hidap kegagalan buah pinggang tahap akhir

Oleh Fazrik Kamarudin
bhnews@bh.com.my

Kuala Lumpur

Saya tak pernah mengalah dan saya tak akan mengalah. Allah memilih saya untuk menghadapi ujian ini."

Bukan kecil dugaan dilalui Khairul Shazwali Taib, 32, sosok yang aktif di padang dan balapan lebih separuh usianya sebelum tiba-tiba terlantar sakit selepas disahkan menghidap kegagalan buah pinggang tahap akhir akibat 'Polycystic

Kidney Disease' (PKD), dua tahun lalu.

Peringkat awal, doktor mendapati kedua-dua buah pinggangnya hanya berfungsi pada tahap sembilan peratus.

Aktif sebagai pemain ragbi ketika menuntut di Universiti Putra Malaysia (UPM) dan mewakili Negeri Sembilan serta Selangor, Khairul Shazwali mengakui pernah berasa kecewa apabila putaran hidup membuatnya seakan tidak berma-yah.

Tidak pernah mengalah

Jurutera kanta kamera yang juga bapa kepada dua cahaya mata itu berkata, keluarga dan teman menjadi sistem sokongan untuk meruskan kehidupan.

"Memang sukar dan perit pada mulanya, malah pernah terbit rasa marah serta putus asa kerana kudrat bagaikan terbatas.

"Saya tertanya-tanya mengapa saya perlu menghadapi semua ini kerana kalau nak ikutkan saya aktif, saya jaga makan, saya

jaga kesihatan.

"Perlahan-lahan saya mulai sedar sepanjang hidup saya tidak pernah mengalah, maka saya jadi-kan dorongan keluarga dan teman sebagai kekuatan menjalani rawatan," katanya ketika ditemui, baru-baru ini.

Antara tunjang semangat Khairul Shazwali ialah anak sulungnya, Hawra Naaila, berusia empat tahun.

Pada usia semuda itu, katanya, puteri kesayangan bersama isterinya, Juliwar Idrus, 32, kerap menyebut ingin menjadi doktor untuk menyembuhkan bapanya.

Khairul Syazwali perlu menjalani rawatan dialisis Continuous Ambulatory Peritoneal Dialysis (CAPD) empat kali sehari dengan setiap sesi mengambil masa satu jam untuk seumur hidup.

"Semakin kuat saya melawan semakin banyak didatangi ujian kerana setahun selepas menjalani CAPD, saya perlu melakukan rawatan dialisis darah (HD)," katanya.



Memang sukar dan perit pada mulanya, malah pernah terbit rasa marah serta putus asa kerana kudrat bagaikan terbatas"

Khairul Shazwali Taib,
Pesakit

Khairul Shazwali mengaku pernah kecewa dan putus asa.